

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- किश्तवाड़ जिले दे छात्तरू जांगली इलाकें च जारी टाकरे च सुरक्षा बलें त्रऊं आतंकवादिएं गी मारी मकाया ऐ, खरी मती मात्रा थेआर—असलाह ते गोलाबरूद बी बरामद।
- उपराज्यपाल मनोज सिन्हा होरें नमीं दिल्ली च अयोध्या पर्व 2025 गी संबोधत कीता ते आखेआ जे अयोध्या छड़ी इक भूगोलिक थाहर गै नेई सगुआं आध्यात्मिकता, सुशासन ते सगुसगु संस्कृति दा केन्द्र बी ऐ।
- उपमुख्यमंत्री सुरिन्दर चौधरी होरें आखेआ ऐ जे सरकार उद्यमता गी बढ़ावा देने बक्खी चेचा ध्यान देआ'रदी ऐ। उनें श्रम ते रोजगार मैहकमे दी कारकरदगी दी समीक्षा कीती।
- मंत्री सतीश शर्मा होरें महाफज खाने दे रिकार्ड दा 100 प्रतिशत डिजीटीकरण करने पर जोर दित्ता ऐ।
- मुख्य भरै च अज्ज श्री हनुमान जयंति मते उत्साह ते श्रद्धा भाव कन्नै मनाई जा'रदी ऐ। जम्मू च बी मंदरें च खूब रौनक ते श्रद्धालुएं दा रश दिक्खने गी लब्भा'रदा ऐ।

<><><><><><>

Terrorists Killed

जम्मू संभाग दे किश्तवाड़ जिले च छात्तरू आहले जांगली इलाके च सुरक्षाबलें आसेआ चलाए जा करदे आतंकवाद—रोधी अभियान च द'ऊं होर आतंकवादिएं गी मारी—मुकाई दित्ता गेआ ऐ। एह्दे शा पैहले जंदे रोज सुरक्षाबलें इक आतंकवादी दा सफाया कीता हा। करठन फ्हाड़ी इलाका ते खराब मौसम दे बावजूद सुरक्षाबलें पूरे तगड़ेयाई कन्नै अपना अभियान जारी रक्खेआ। टाक्करे आहली थाहरै थमां खरी मती मात्रा च थेहार—असलाह ते गोला—बरूद बरामद कीता गेआ ऐ, जेह्दे च 1 एके ते 1 एम—4 रैफल बी शामिल ऐ। अभियान अजें बी जारी ऐ ते ब्योरे गी अजें बलगेआ जा'रदा ऐ। ध्यानजोग ऐ जे इलाके च आतंकवादिएं दे छप्पे होने दी टकोह्दी सूह् थोने मगरा सुरक्षाबलें 9 अप्रैल गी किश्तवाड़ दे छात्तरू आले जांगली इलाकें च सांझे तौरा पर एह् अभियान रंभेआ हा।

<><><><><><>

LG Ayodhya Parv

उपराज्यपाल मनोज सिन्हा होरें कल नमीं दिल्ली च “अयोध्या पर्व 2025” गी संबोधत कीता। एह कार्यक्रम इंदिरा गांधी नेशनल सेंटर फॉर आर्ट्स, श्री अयोध्या न्यास ते प्रजा संस्थान आस्सेआ आयोजित कीता गेदा हा। इस मौके पर उपराज्यपाल होरें त्रऊं दिनें दे सांस्कृतिक पर्व पर सब्बनें गी बधाई दित्ती। उनें आखेआ जे अयोध्या छड़ी इक भूगालिक थाहर गै नेई ऐ सगुआं एह अध्यात्म, सुशासन ते साढ़ी सगोसार संस्कृति दा इक केन्द्र बी ऐ। भगवान राम हुंदी जन्म भूमि साढ़ी पंछान ते इकजुटता दा चिह्न ऐ। उपराज्यपाल होरें एह बी आखेआ जे अयोध्या प्राचीन भारत दी ऐसी सौम्य शक्ति रेही ऐ जिन्ने अपने सरल पर सुददे प्रभाव कन्नै दुनिया भरै च अध्यात्मिक मुल्यें कदरें ते विचारें गी बढ़ावा दिंदे होई भारतीय लोक संस्कृति दा व्यापक म्होल दुनिया भरै च कायम करने दा कम्म कीता ऐ। इस मौके पर बोलदे होई उपराज्यपाल मनोज सिन्हा होरें आखेआ.....

<><><><><><>

Dy.CM

उपमुख्यमंत्री सुरिन्दर चौधरी होरें कल जम्मू च श्रम ते रोजगार मैहकमे दे कर्मेकाजें दा जायजा लैने लेई इक बैठक दी अध्यक्षता कीती। बैठक दरान मैहकमे आस्सेआ बक्ख-बक्ख स्कीमें तैहत प्रस्तुति ते उपलब्धिएं गी उजागर करने लेई इक पावर पोआइंट प्रेसनटेशन बी कीती गई। इस दरान उपमुख्यमंत्री होरें गी जानकारी दित्ती गई जे मैहकमे दी 10 लक्ख रपे कोला घट्ट दी लागत आलिं 65 लक्ख भलेया लौहके उद्यम कायम करने दी योजना ऐ जेहदे च आवेदकें गी दोहार दे बदले कार्ड जमानत जमा कराने दी लोड़ नेई होग की जे मिशन युवा लेई कुल बजट 1 ज्हार 8 सौ 30 करोड़ रपे ऐ। उपमुख्यमंत्री होरें इस मौके पर सरकार आस्सेआ चलाई जा'रदी बक्ख-बक्ख श्रम ते रोजगार सरबंधी योजनाएं थमां लाह ठोआने बारे। लोकें गी जागरूक बनाने दी लोड़ पर जोर दित्ता तां जे लाभार्थिं तगर इंदा बरोबर लाह पुज्जी सकै। मगरा मुख्यमंत्री होरें केई शिष्टमंडलें कन्नै मलाटी कीती ते उंदे मसलें दा नबेड़ा करने दा जकीन बी दोआया।

<><><><><><>

OBC Delegation

साबका मंत्री रामपाल हुंदी अगुवाई च कल अनुसूचित जातिएं, जनजातीएं ते होरने पिछड़े वर्गें दा इक शिष्टमंडल कल जम्मू दे सिविल सचिवालय च जनजातीय मामलें दे मंत्री जावेद अहमद राणा होरें गी मिलेआ ते अपनियां केई मंगां उंदे अग्रे रखियां जिंदे च ओबीसी बोर्ड दा नमें सिरेया गठन करना, नौकरिं च तरक्की दिंदे'लै आरक्षण देने, कमजोर तबकें दे लोकें दी भलाई बेहतरी लेई संवैधानिक बवस्थाएं गी बनाई रखने ते होर केई मंगा शामिल हियां।

शिष्टमंडल नै तालीमी इदारे च दाखले च बी आरक्षण लागू करने दी मंग बी कीती। मंत्री होरें उंदिएं मंगें गी धरोइयै सुनेआ ते नियमें मूजब उंदे पर गौर करने दा भरोसा दोआया।

<><><><><><>

Jal Jeevan Mission

जल जीवन मिशन जम्मू कश्मीर दे मिशन डरैक्टर खुरशीद अहमद शाह होरें जम्मू प्रांते दी सब्बै पीएचई डिवीजनें दी इक समीक्षा बैठक लाई। एह् बैठक वर्चुअल तरीके राएं लाई गेदी ही। जेह्दे च पीएचई दे चीफ इंजीनियर, सिविल ते मकैनिकल डिवीजन दे इंजीनियर ते होरने मुत्तलका अधिकारी बी शामिल हे। बैठक दरान मिशन डरैक्टर होरें कम्में दी प्रगति ते रफ्तार दा जायजा लैता ते इंजीनियरें गी निर्देश बी जारी कीते जां अपनी-अपनी डिवीजनें च कम्में दी रफ्तार गी तेज करन।

<><><><><><>

Archives

ट्रांसपोर्ट मंत्री सतीश शर्मा होरें जम्मू कश्मीर च आरकाइव्ज यानि महाफजखाने दे रिकार्ड दा 100 प्रतिशत डिजीटिकरण करने दा आह्वान कीता ऐ। जम्मू दे कन्वेंशन सेंटर च कल लोआई गेदी, महाफजखाने सरबंधी राष्ट्रीय समिति दी दऊं रोजा 49मीं बैठक दे उद्घाटन सत्र दरान बतौर मुख् परौहने गल्ल करदे होई मंत्री होरें केन्द्र शासत प्रदेश च इस भेठा अजें तोड़ी होए दे कम्में दी सराहना कीती ते आखेआ रिकार्ड दा डिजीटिकरण साढ़े एतिहासक, कलात्मक ते सांस्कृतिक विरसे गी सजाइयै रखने च मती महत्वै आली भूमका नभांदा ऐ। केन्द्री संस्कृति मंत्री गजेन्द्र शेखावत होरें बी इस कार्यक्रम च ऑनलाइन शिरकत कीती।

<><><><><><>

Hanuman Jayanti

अज्ज देश भरै च हनुमान जयंती पूरे धार्मिक जोश दे कन्नै मनाई जा'रदी ऐ। धार्मिक ग्रंथ मताबक चैत्र महीने दी पुण्या गी भगवान बजरंगबली हुंदा जन्म होआ ऐ जेह्दे उपलक्ष्य च हर ब'रे हनुमान लन्मोत्सव दा ध्यार मनाया जंदा ऐ। जिसी हनुमान जयंति बी आखेआ जंदा ऐ। मन्नेआ जंदा ऐ भगवान हनुमान होर सांभधाम धरतह पर मजूद न ते जेह्ड़ा बी पूरी श्रद्धा ते आस्था कन्नै उनेंगी चेता करदा ऐ, बजरंगबली उंदे सब्बने कठिनाइएं दा निवारण करदे न। जम्मू शैहरा च बी एह् ध्यार बड़ी मती श्रद्धा ते उत्साह कन्नै मनाया जा'रदा ऐ। बडलै सवेला गै लोक भगवान हनुमान हुंदे मंदरें च जाइयै मत्था टेका'रदे न ते बल-बुद्धि दा आशीवाद बी प्राप्त करा'रदे न.....

<><><><><><>

Baisakhi Srinagar

श्रीनगर दे जबरवन पार्क च सैलसफा मैह्कमे आस्सेआ बैसाखी महोत्सव दा सरिस्ता कीता जा'रदा ऐ जेह्दे च केई रंगारंग ते सांस्कृतिक कार्यक्रम दिक्खने गी लब्धगन। एह् बैसाखी महोत्सव 13 अप्रैल गी संजा 5 बजे भांगड़ा ते सांस्कृतिक नाच कन्नै शुरू होग। इस दरान लोक पंजाब दी कला संस्कृति ते खान पान, रैहन सैहन दा छलैपा दिक्खने ते एह्दे कन्नो कन्नी मकामी व्यंजनें दा नंद लैंगन। इस कार्यक्रम दा मकसद सैलसफा गी बढ़ावा देने दे कन्नो कन्नी बक्ख-बक्ख समुदाय दियां सगोसार संस्कृतिएं दा जशन मनाइयै लोकें गी किट्ठे आन्नना ऐ।

<><><><><><>

By Poll

27 नंबर बडगाम ते 77 नंबर नगरौटा विधानसभा हल्के लेई करोआए जाने आले उप-चुनाएं लेई मतदाता सूचिएं दी विशेष नजरसानी सरबंधी गतिविधियां हुन रफतार फगड़दियां जा करदियां न। भारतीय चुनां आयोग दे दिशा निर्देशें मूजब इनें दऊं हल्के लेई मतदाता सूचियां 8 अप्रैल गी पैहले गै शायी करी दित्तियां गेदियां न जिंदे च पैहली अप्रैल गी क्वालीफाइंग डेट रखेआ गेदा ऐ। क्वालीफाइंग डेट ओ तरीक होंदी ऐ जिसी आधार मन्नदे होई मतदाताएं बारे जानकारी सूचिएं च दर्ज होंदी ऐ यानि उस तरीक गी ओह्दी उमर ते होर दूई जानकारी इससै चाल्ली नमें नां दर्ज कराने जां नां कटाने, पता दर्ज करने जनेए सुधार बी उससै तरीक गी आधार मन्नदे होई कीते जंदे न। इस सरबंधे च कुसै बी चाल्ली दे दावे जां आपत्तियां 24 अप्रैल तगर दर्ज कराइयां जाई सकदियां न, इंदा नबेड़ा 2 मई 2025 तगर करियै 5 मई गी फाइनल सुचियां जारी करी दित्तियां जांगन।

<><><><><><>